

दिनांक 31.03.2024  
समय: 18.50 बजे

आकाशवाणी जयपुर-अजमेर

प्रादेशिक समाचार।

- लोकसभा चुनाव रे मद्देनजर प्रदेश मांय चुनाव प्रचार तेज-भाजपा रा वरिष्ठ नेता अर गृह मंत्री अमित शाह जैपर मांय भाजपा क्लस्टर प्रभारियां री ली बैठक-सीकर मांय कर्यो रोड़ शो।
- प्रदेश मांय न्यारी-न्यारी जगावां माथे मतदान रे प्रति जागरूकता खातिर स्वीप गतिविधियां रो हो रियो है आयोजन।
- ईस्टर परब माथे आज राज्य रा गिरिजाघरां मांय हो रिया है खास आयोजन।

अर

- प्रदेश मांय केई ठोड़ां माथे व्ही हल्की बिरखा सूं लोगां ने गर्मी सूं मिळी राहत।

000

लोकसभा चुनाव ने ले र प्रदेश मांय राजनीतिक गतिविधियां तेज व्हेगी है। न्यारा-न्यारा दळां रा स्टाेर प्रचारक चुनाव मांय जुटग्या है। इण रे तैत केन्द्रीय गृहमंत्री अर भाजपा रा वरिष्ठ नेता अमित शाह आज जयपुर पहुंच्या। श्री शाह जवाहर सर्किल स्थित होटल मांय आयोजित पांच लोकसभा सीटां चूरू, करौली-धौलपुर, नागौर अर दौसा री कोर कमेटियां री संयुक्त बैठक ने संबोधित करयो। बैठक मांय मुख्यमंत्री भजन लाल शर्मा, भाजपा प्रदेश अध्यक्ष सी.पी जोशी साथे प्रमुख नेता मौजूद रिया। इण रे पाछे श्री शाह सीकर पहुंच्या, जठे वणा भारतीय जनता पार्टी रा प्रत्याशी स्वामी सुमेधानंद रे पक्ष मांय एक रोड़ शो मांय भाग लियो। श्री शाह रो सिज्यां जयपुर पाछो आवण रो कार्यक्रम है, अठे वे न्यारा-न्यारा सामाजिक संगठनां रे प्रबुद्धजनां सूं संवाद करेला। इण रे पाछे भाजपा प्रदेश कोर कमेटी री बैठक मांय भेळा होवेला अर रात्रि विश्राम भी अठे ई करेला। गृह मंत्री काले सुंवारे जोधपुर खातिर रवाना होवेला, जठे वे जोधपुर, पाली, जालोर, सिरोही अर बाडमेर री संयुक्त कोर कमेटी री बैठक लेवेला। इण रे पाछे वे लोकसभा बूथ अध्यक्ष सम्मेलन ने भी संबोधित करेला। केन्द्रीय सूचना प्रसारण मंत्री अनुराग सिंह ठाकुर भी आज जयपुर दौरे माथे रिया। इण रे चालता वणा एक कार्यक्रम ने सम्बोधित भी करयो। वठी ने कांग्रेस री वरिष्ठ नेता सोनिया गांधी रो 6 अप्रैल ने प्रदेश दौरे रो कार्यक्रम है। इण रे चालतां पार्टी रा राष्ट्रीय अध्यक्ष मल्लिकार्जुन खड्गे अर राहुल गांधी भी साथ रेवेला। इणी दिन कांग्रेस आपरो घोषणा पत्र भी जारी कर सके है। पैली आळा मुख्यमंत्री अशोक गहलोत सिरोही जिला रा दो दिनां रे दौरे माथे है। आज वणा जिले रे रेवदर मांय कांग्रेस कार्यकर्ता सम्मेलन ने संबोधित करयो।

000

भारतीय जनता पार्टी राजस्थान मांय भीलवाड़ा लोकसभा सीट खातिर दामोदर अग्रवाल ने आपरो उम्मीदवार घोषित करयो है। श्री अग्रवाल प्रदेश भाजपा महामंत्री रा पद माथे काम कर रिया है। श्री अग्रवाल टिकट मिलण री सूचना माथे आपरे समर्थकां ने खुशी जाहिर करी। ध्यान जोग है कि इण सीट माथे कांग्रेस आपरा पैली आळा प्रत्याशी दामोदर गुर्जर ने राजसमंद सीट माथे शिफ्ट करणे रे पाछे डॉ. सी पी जोशी ने आपरो प्रत्याशी बणायो है।

000

लोकसभा चुणाव मांय मतदान प्रतिशत बढ़ाणे अर लोगां ने मतदान खातिर प्रेरित करणे रे लगस सूं राखी जा री स्वीप गतिविधियां रे तैत डूंगरपुर मांय पर्यटन महकमा अर जिला प्रशासन कानी सूं जागरूकता कार्यक्रम राखीज्या। शहर री **गेपसागर झील** किनारे रंगोली अर मेहंदी होड़ व्ही। इण मांय युवतियां अर महिलावां सड़क माथे मतदाता जागरूकता सूं जुड़ी रंगोलियां बणायी। वठी ने हाथां मांय मेहंदी रचा र मतदाता जागरूकता रो सन्देश दियो। मतदाता जागरूकता ने ले र आज उदयपुर मांय फतेहसागर री पाल सूं गांधी ग्राउंड ताई मैराथन रो आयोजन करयो गयो। मैराथन दौड मांय भाग लेवण वाळा लोगां ने 26 अप्रैल ने जरूरी रूप सूं मतदान करणे खातिर जागरूक करयो गयो। करौली मांय **नेहरू युवा केंद्र** कानी सूं कैलादेवी मन्दिर रा मुख्य द्वार अर कैलादेवी आश्रम रे मुख्य द्वार री दीवारां माथे वॉल पेंटिंग रो काम करयो गयो। वॉल पेन्टिंग रे माध्यम सूं मतदाता जागरूकता रो संदेश देणे रे साथे ही सामाजिक बुराईयां सूं दूर रेहणे री अरज करी। स्वीप गतिविधियां रे तैत चूरू मांय रंगोली होड़ राखीज्यी। इण होड़ मांय पढेसरी रंगोली बणा र मतदान जागरूकता रो संदेश दियो।

000

लोकसभा चुनाव रे मद्देनजर आकाशवाणी समचार जैपर री कानी सूं मतदाता जागरूकता खातिर संदेश श्रृंखला सरू करी ज्यी है। इण मांय श्रोता संदेश भेज र आमजण ने वोट डालणे खातिर प्रेरित कर सके है। श्रोता आप रा संदेश रिकॉर्ड कर या टाईप कर व्हॉट्सअप नम्बर 94140-52368 माथे भेज सके है। चुनिन्दा संदेशां ने समाचार बुलेटिनां मांय भेळा कर्या जावेला। इणी कड़ी में आज सुणो म्हाणा सीकर जिला रा एक श्रोता रो संदेश –

000

प्रदेश मांय शांतिपूर्ण, निष्पक्ष अर स्वतंत्र लोकसभा चुणाव करावण खातिर प्रशासन मुस्तैदी सूं जुट्योडो है। म्हारा भरतपुर संवाददाता बतायो कि निर्वाचन महकमा रा हुक्म माथे भरतपुर मांय अंतर्राज्यीय सीमा माथे कड़ी चौकसी बरती जा री है।

000

राष्ट्रपति द्रौपदी मुर्मू आज पैली आळा उपप्रधानमंत्री अर भारतीय जनता पार्टी रा वरिष्ठ नेता लालकृष्ण आडवाणी ने देश रा सर्वोच्च नागरिक सम्मान भारत रत्न सूं नवाज्यो। वयोवृद्ध नेता श्री आडवाणी रे रेहवास माथे जा र वां ने ओ सम्मान प्रदान करयो ग्यो। उपराष्ट्रपति जगदीप धनखड़, प्रधानमंत्री नरेंद्र मोदी, पैली आळा उपराष्ट्रपति एम.

वेंकैया नायडू, रक्षामंत्री राजनाथ सिंह, गृहमंत्री अमित शाह अर श्री आडवाणी रा पिरवार रा सदस्य इण मौके माथे मौजूद हा। एक सोशल मीडिया पोस्ट मांय राष्ट्रपति कयो कि भारतीय राजनीति रा शिखर व्यक्तित्व लाल कृष्ण आडवाणी आपरे दृढ़ समर्पण अर असाधारण कौशल रे साथे सात दशकां सूं भी बत्ती बगत ताई देश री सेवा करी है। साल 1927 में कराची मांय जनम्या श्री आडवाणी 1947 मांय बंटवारे रे बगत भारत आ गया। सांस्कृतिक राष्ट्रवाद रा लगस रे साथे वणा दशकां ताई कड़ी मेहनत करी, जिण सूं देश रा सामाजिक-राजनीतिक परिदृश्य मांय बदलाव आयो। राष्ट्रपति कयो जद आपातकाल देश रे लोकतंत्र खातिर खतरो बण्यो, श्री आडवाणी अदम्य हौसला सूं देश ने सत्तावादी ताकतां सूं बचावण मांय मदद करी। ध्यान जोग है कि भारत रत्न देश रो सर्वोच्च नागरिक अलंकरण है। ओ मानव प्रयास रे किंणी भी क्षेत्र मांय असाधारण सेवा अर उत्कृष्टतम कामां खारित दियो जावे है।

000

केंद्रीय अन्वेषण ब्यूरो –सीबीआई आपरे थापना दिवस रे मौके माथे काले 20वां डी.पी कोहली स्मारक व्याख्यान राखेला। भारत रा मुख्य न्यायाधीश डी. वाई चंद्रचूड काले नई दिल्ली रा भारत मण्डपम मांय डीपी कोहली स्मारक व्याख्यान देवेला। इण बरस री थीम है – उन्नत आपराधिक न्याय प्रक्रिया के लिए प्रौद्योगिकी का उपयोग। मुख्य न्यायाधीश इण मौके माथे सीबीआई अहलकारां ने विशिष्ट सेवा खातिर राष्ट्रपति पुलिस पदक अर उत्कृष्ट सेवावां खातिर पुलिस पदक प्रदान करेला। केंद्रीय अन्वेषण ब्यूरो री थापना एक अप्रैल 1963 मांय व्ही ही। इण रो लगस खाली भ्रष्टाचार अर रिश्वतखोरी रा मामलां री छाणबीन करणो नी है बल्कि वित्तीय कानूनां रो उल्लंघन अर गंभीर अपराधां री भी जांच करणो है।

छह बरस सूं बत्ती री सेवा अवधि मांय सीबीआई देश री एक प्रमुख जांच एजेंसी रे रूप मांय उभरी है। आ भारत मांय इंटरपोल खातिर राष्ट्रीय केन्द्रीय ब्यूरो रा रूप मांय कानून प्रवर्तन में अंतर्राष्ट्रीय सहयोग-समन्वय भी उपलब्ध करावे है। सीबीआई आपरे संस्थापक निदेशक रै प्रति सम्मान जताता थकां बरस 2000 सूं डीपी कोहली स्मारक व्याख्यान माला रो आयोजन करती आ री है।

000

ईस्टर रो परब आज देशभर मांय हर्षोल्लास अर सिरधाभाव सूं मनायो जा रियो है। मान्यता है कि सूली माथे चढ़ाया जावण रे पाछे प्रभु यीशु आज ही रे दिन पाछा जीवता व्हीया हा। प्रधानमंत्री नरेंद्र मोदी ईस्टर परब री देशवासियां ने शुभकामनावां दी है। सोशल मीडिया संदेश मांय श्री मोदी आस जताई है कि ओ विशेष मौको नवीनीकरण अर आशावाद रो संदेशो देवे है। वणा मानव जाति रे बीचे एकता अर शांति री कामना करी। प्रदेश मांय भी केई जगावां माथे ईस्टर परब माथे न्यारा-न्यारा धार्मिक कार्यक्रम राख्या जा रिया है। सवाईमाधोपुर जिला मांय गिरिजाघर मांय खास प्रार्थना सभा राखीज्या जठै ईसाई समुदाय प्रभु यीशु रा पुनर्जन्म री शुभकामनावां दी।

000

शीतला माता री पूजा रो लोकपर्व बास्योड़ा यानि शीतलाष्टमी, राजधानी जयपुर साथे प्रदेश रा न्यारी-न्यारी ठोड़ां मांय काले मनायी जावेला। इण दिन महिलावां सुंवारे बेगी ही शीतला माता री पूजा करणे मन्दिरां मांय पहुंचे है। शीतला माता ने ठण्डा पकवानां रो भोग लगायो जावेला। इण सूं पैल्या आज रांधा पुआ माथे शीतला माता ने चढावण खातिर न्यारा-न्यारा केई तरह रा पकवान बणाया जावेला। शीतलाष्टमी माथे प्रदेश री

न्यारी-न्यारी जगावां माथे मेळा भी लागेला। जयपुर जिला मांय थापित चाकसू मांय शील डूंगरी रा शीतला माता मिन्दर मांय आज सूं दो दिनां रो मेळो सरू व्ह्यो। वठी ने बाड़मेर जिला रा भेडाणा गांव मांय भी आज सूं मेळो सरू हो रियो है। राज्यपाल कलराज मिश्र शीतलाष्टमी रे लोकपरब माथे प्रदेशवासियां ने शुभकामनावां दी है।

000

प्रदेश रा उत्तर-पश्चिमी हळका मांय लारला चौबीस घंटा मांय कठे-कठे हल्की बिरखा दरज करीजी है। श्रीगंगानगर अर हनुमानगढ रे आसे-पासे री जगावां माथे काले बादल गरजणे रे साथे बिरखा व्ही। मौसम महकमे रे मुजब प्रदेश रा घणखर ठोडां माथे बत्ती तापमान मांय 2 सूं 3 डिग्री सेल्सियस री कमी दरज करीजी है। मौसम केन्द्र जयपुर रा निदेशक डॉ. राधेश्याम शर्मा बतायो के आवता चार-पांच दिनां मांय मौसम सूखो रेवेला। सप्ताह रे आखिर मांय नुवो पश्चिमी विक्षोभ सक्रिय होणे री आस है।

.....  
सिरोही जिला मांय गर्मी रे असर मांय इजाफो व्ह्यो है। जिला रा प्रसिद्ध पर्वतीय पर्यटन स्थल माउंट आबू मांय सुंवारे अर सिंज्या मौसम मांय ठण्डक बण्योडी है।

000

भारत रो विदेशी मुद्रा भंडार 22 मार्च ने पूरो हुओ लारले सप्ताह मांय 14 करोड डॉलर बढ र आपरे अबे ताई रे उच्चतम स्तर छह सौ 42 अरब डॉलर सूं बत्ती हो ग्यो है। भारतीय रिजर्व बैंक री कानी सूं जारी आंकड़ां मांय कयो गयो है कि लगातार पांचवें सप्ताह विदेशी मुद्रा भंडार मांय बढोतरी दरज करीजी है। सप्ताह रे चालता स्वर्ण भंडार मांय 34 करोड 70 लाख डॉलर री बढोतरी व्ही है अर अबे ओ 51 अरब डॉलर सूं बत्ती हो चुक्यो है।

00000